



KOLOREZTATZEKO KOADERNOA

Izenburua: 'Ametsen margolari'. **Egilea:**

Emaisia emakumeen elkarte eta Urtxintxa eskola. **Marrazkiak:** Eñaut Aiertzauguena.

Orrialde kopurua: 23 orrialde. **Argitaletxea:** Emaisia.

Izaskun Guarrotxena

'AMETSEN MARGOLARI' KOLOREZTATZEKO KOADERNOAREN KOORDINATZAILEA

«Bakoitzak bere alea jartzen badu, aldaketarako bidea osatuko dugu»

Margotuz ikasteko modua izan nahi du *Ametsen margolari* koloreztatze-ko koadernoak. Ohikoen orde, ahalik eta kolore gehien erabiltzeko sortu dute Urtxintxa eskolak eta Emaisia emakumeen elkarteak, elkarlanean. Betaurreko moreak ditu azalean, hain zuzen ere, haurrei errealitatea horiek jantzita ikusarazi nahi dietelako. Haien aurretik, ordea, helduek ere janztea «beharrezkoa» da. *Xake Mate!* jostailu eta baliabide pedagogikoen bildumako hamargarren alea da; bi eragileek jarrera sexistei aurre egiteko sortu zuten bilduma hori, hain zuzen ere.

Nondik dator Ametsen margolari egiteko ideia?

Emaisia eta Urtxintxaren artean urtero egin izan dugu *Xake Mate!* deitzen dugun bilduma. Duela hamar bat urte sortu genuen, jolasak eta begirale eta hezitzaileentzako materialak sortzeko. Egun haurrentzat sortu duten imajinarioa oso markatuta dago; este-reotipo oso konkretuetan oinarritzen da. Beraz, pentsatu genuen badela garaia beste era bateko imajinarioak sortzeko eta horretarako materiala garatzeko. Koloreztatze-ko koadernoarekin, bestelako erreferente batzuk sortu nahi izan ditugu.

Zer-nolako

marrazkiak ditu koadernoak?

Denetarik: emakumeak hainbat lanbidetan, hainbat gorputz eredu, identifikaziorik gabeko hainbat haur eredu, hainbat kirol non neskak zein mutilak jolasten diren...

Mundua betaurreko moreekin ikusteko gonbita egin duzue. Zer ikusten da horien bidez?

Beste mundu bat ikusten da horien bidez, non pertsona guztiak berdinak garen, balio berak ditugun eta, azken batean, inolako genero diskriminaziorik ez dagoen. Sistema patriarkala apurtu nahi dugu, eta berdintasunean oinarritutako jendartea sortu.

Gizon eta emakumeen parekidetasunaz gain, bestelakoak ere landu dituzue.

Bai, ezintasun fisikoak dituztenekin, etorri berriak direnekin... Kontuan izan behar dugu egun Euskal Herria oso plurala dela eta hainbat koloretakoa dela. Betaurreko moreak jantzi eta bestelako heziketa bat ematen badiegu gure haurrei, balio feministetan oinarrituta, eurak ere gai izango dira koloretako mundu hori ikusteko.

Zer egin dezakete guraso eta hezitzaileek balioen transmisioan?

Askol! Egia da haurren jendarteratze prozesuan, balioen transmisio-

an, hainbat eragilek parte hartzen dutela: eskolek, familieek, lagunek... Telebista ere hor dago, zoritxarrez; jostailuak... Guraso eta hezitzaileok beste mundu justuago bat posible dela ikusarazten badiegu, haurrek euren begitxoekin ikusi ahalko dute. Denon artean bestelako harremanak sor ditzakegu. Zer transmititu nahi diegun erabakitzea gure esku dago: tartean, jarrera sexistarik ez izatea.

Xake Mate! bildumaz gain, bada merkatuan helburu bera duen materialik?

Bai, hainbat jolas daude. Hainbat elkarte dabilta lan hori egiten, eta, zorionez, baditugu hainbat ipuin eta jolas. Gabonetako jostailuen katalogoak hartu eta ezusteko nahiko kaskarra hartzen duzu; agian erakutsi beharko diegu jostailu horiek ez direla ez neskenak eta ez mutilenak, denonak izan daitezkeela. Horrela, katalogo horiek irudikatzen dutena apurtzea lor dezakegu. Badakigu askotan marea handi baten aurka goazela, baina posible da horri aurre egitea, eta jende asko gabiltza lanean hori hala izateko. Bakoitzak bere alea jartzen badu, aldaketarako bidea egingo dugu.

Kontzientzia hartu beharra dugu?

Bai horixe! Helduon kontzientziatik hasi behar dugu, bai haurrak ditugunok eta bai horien heziketaz arduratzen garenok. Gure jarrera aldatzetik hasi behar dugu, haurrek horren bidez ikas dezaten.

Ametsen margolari du izena koadernoak: egunen batean errealitate izango diren ametsak ote?

Espero dugu baietz! Gu, behintzat, hemen ari gara mundua eraldatu nahian. Ez bakarrik hori: bestelako pertsonak nahi ditugu. Hori lortzeko guk geuk ere aldatu behar dugu, eskemak apurtu. Ez gara burbuila batean bizi; hainbat gauzak eragin dute gure hezkuntzan, eta, noski, akatsak ere baditugu. Helduak gara, eta badakigu gauzei nola egin aurre, baina askotan hainbat zirrikitutatik ihes egiten digute gauzek.

